

von Wulf Wager

Weltendgangshaftong



Erinneret Se sich no an des Mordserdbeba in Italia letzschd Johr? Wega dem send jetzt a paar Erdbeba-forscher von dr italienischa Juschtiz zu lange Haftstrofa verurteilt worda. Dr Grund: Dia hend falsche Vorhersaga troffa.

Jetzt send nadierlich älle Berufsexperta brudal beo'ruhigt, dass ihne so eb-

bes au passiera kennt. Denkat se bloß amol an die Vorhersaga, was da saure Reaga ond dr Wald betrifft, oder die ganze sonschtige Klimaveränderonga. Stelat Se sich amol vor, dass di Pole net abschmelzat ond d' Nordsee net bis zur Kölner Bucht kommt. Ja, wen mach mr denn do haftbar, wenn des net ei'tritt ond die ganze Fischkepf vorher vor dr Flut zu ons gflüchtet send?

Oder no schlimmer: Was mach mr, wenn am oisazwanzigschta Dezember d' Welt net ondrogoht, wenn am 22. Dezember emmr no alles so isch wia am Dag vorher ond mir am 25.12. womöglich Chrischttag feirat? Mei Lieaberle, no miasstat dia Maya aber mit ganz sche hohe Schadensersatzforderonga meinerseits rechna. Schließlich han i mi zemlich vrschuldet, zom dia Dag bis do na nomole richtig zom genießä. Außerdem han i mein Körper mit guadem Wai, hervorragendem – aber halt net xondem – Essa überstrapaziert. Was, wenn i jetzt noch em 21. Dezember für des au no grad standa miasst? Ha, irgend oin Maya werd i scho fenda. Ond den schlepp i no en Italia vor Gricht wega Falsch-Vorhersage, no ka der zahla bis zom Weltendgang!

Bis näggschd Woch
Ihr

Wulf Wager

Alle Kolumna zom Nochlesa
onder: www.woascht.de oder em facebook em
Wulf Wager Fanclub